

聖

武

記

聖武記卷十

邵陽魏源譌

嘉慶川湖陝靖寇記五

五年六月教首劉之協被禽于河南時邾縣翟家寨有
千賊新起吳熊光駐防盧氏布政使馬慧裕乘其烏合
撲滅之知劉之協脫逃旋獲諸葉縣奏聞上以劉

之協首創邪教毒流五省逋誅數載特命侍郎高杞侍
衛與常馳驛檻送至京御製邪教說以但治從逆

不治從教之旨宣示中外是年冬安徽民張全習邪教
令其子張效元與同教三人潛出嘉峪關赴喀什噶爾

成所訪其教首王發生效元回至四川賊營畏罪出首

詔遞回原籍父子免死以安反側額勒登保六月

復追陝賊由棧道入隴于是南山無賊乃遣楊洪並渭

西上擊汧隴之賊遣穆克登布由徽縣兩當擊秦州之

賊而分兵扼棧道防其折竄時長麟所追伍金柱張士

龍冉學勝等與楊遇春所追高馬等皆至秦州因渭河

有備不能北渡合隊順渭而東衆二萬夜襲長麟軍于

徽縣將軍富成敗死額勒登保檄官兵嚴防棧道及渭

河北岸復令穆克登布赴楊遇春軍而自率慶成等馳

扼唐藏與恆瑞夾擊七月賊竄棧不遂復折奔西和成

縣楊遇春移軍西剿而高馬戴諸賊已合隊東南犯略陽沔縣西鄉總兵札勒杭阿提督王文雄先後戰死恆瑞以兵四千赴西鄉其張冉伍等賊自階州折回遇楊遇春穆克登布阿哈保等三路會擊禽斬三千餘賊潰赴太平河與辛聰顏勝可等合奔沔略而總督長麟亦自岷州追至與額勒登保合八月慶成斬宋麻子楊遇春斬伍金柱乃以階文餘匪令長麟督阿哈保穆克登布剿之而迎擊冉張等于沔縣時秦鞏西北之賊盡折回陝而高馬等賊屢冒官兵渡漢均爲北岸鄉勇所扼額勒登保檄關騰劉之仁嚴防漢北九月楊遇春慶成

搜餘匪于漢南小巴山各賊與高戴合隊四千突出衝陣官兵奮擊山溝禽斬千計適恆瑞邀擊馬學禮徐天德二賊亦至安康額勒登保自漢中進軍西鄉策應楊遇春遣兵斷二賊之援先攻馬賊禽斬千徐天德走全河口恆瑞軍邀之其棧道以西長麟督剿之賊一伍金柱餘匪二千一伍懷志賊千餘阿哈保穆克登布分剿于階州于唐藏折奔兩河口直趨沔略一曾芝秀由鳳縣老林北竄棧道不遂亦折走石泉涉渡漢江由是棧道以西漢江以北皆無賊賊皆偪歸漢南而紫陽安康所竄川楚之賊較衆額勒登保進軍剿之移棧道防兵

于漢江沿岸而檄慶成長麟嚴防南鄭寧羗杜其折竄
十月額勒登保奏言目下各路賊勢如曾芝秀徐天德
樊人傑已先後偪入川境惟冉張龍三賊在川陝邊界
王廷詔高馬二賊在陝楚邊界而有楚兵攔其前楊遇
春慶溥追其後勢亦必歸入川德楞泰勒保已進巴州
南江又有七十五分擊大兵雲集自可無虞滋蔓臣卽
應整旅入川而陝楚之賊未竣先遣阿哈保將兵勇二
千協剿川賊此外陝甘兵三萬皆歸慶成節制分將分
段以防川賊竄陝之路于是額勒登保進軍紫陽安康
欲驅龍張冉苟四賊與高馬合隊而檄諸軍四面會剿

羣賊望風東奔。楚額勒登保以兵勇二千馳赴二竹。適楊遇春等追徐天德王廷詔高馬諸賊自茅坪至。與大軍夾擊破之。賊走西南。時漢江以北因伍懷志數百賊竄南山老林。穆克登布等兵七千爲其牽綴。慶成調各路分防。兵未集而川賊爲德楞泰剿急。已由略陽分竄入陝。慶成遣副將海洪阿以兵勇三千與阿哈保分禦西鄉。賊半竄回川。半趨白沔峽江岸。涉淺北渡。慶成遣綸布春汪啟追之。留壩禽斬七百餘。時川賊相繼復窺漢。十一月長麟赴南鄭。褒沔以防上游。慶成屯西鄉以防下游。而冉天士樊人傑衆二三千復奔石泉江岸。慶

成截其半濟已先渡河千騎由五郎華陽東奔額勒登保卽率楊遇春回濟漢北邀其赴商雒之路慶成亦伏兵石泉江岸擊破高馬等賊時冉學勝伍懷志殘賊各僅二三百適樊冉二賊至復合隊裹脅數千楊遇春穆克登布突擊于洵陽壩禽斬六百餘賊奔江口留樊賊徽官兵而冉學勝步騎二千先趨商雒間道楊遇春等敗步賊于龍駒寨復邀其騎賊于武關荆子關與綸布春汪啟軍三路截擊賊始不敢東竄額勒登保與諸軍分路追逼而西冉學勝奔漢陰樊冉等奔石泉洋縣適高天得馬學禮王廷詔賊數千復由安康渡漢猝遇大

軍于漢陰。卽東走。額勒登保先遣千騎嘗之。賊果盡銳圍攻。官軍追及。禽斬六百。復數路邀賊。五郎坪。薄暮偏賊上高山之巔。賊插石如雨。官兵以賊偏絕地。露宿圍守。將俟旦一鼓殲之。賊夜縋山後絕壁竄。連日追殺二千。脅從解散殆盡。其楊遇春所追石泉各賊。樊人傑由褒城竄棧西。冉學勝奔華陽。遇伏敗竄。而高天升亦自楚回竄漢北山內。六年正月。德楞泰馳赴經略軍。議驍賊皆聚漢北宜。兩路會剿。而後移軍漢南。以清川。陝交界。乃議德楞泰邀擊高天升。而額勒登保剿高馬王廷詔于漢陰。時高馬等在南山之西。冉學勝在南山之東。

楊遇春追冉賊由二郎壩入南山乘夜突擊高馬賊隊潰斬六百賊奔棧道將西擾秦隴舊路留後隊綴楊遇春而急奔徽鳳棧道冉學勝繼之由是南山賊皆竄棧西其留山內者惟伍懷志一賊額勒登保乃檄長麟楊遇春追賊隴西而自督穆克登布留剿伍賊初四川之賊冉天士龍紹周唐大信自六月爲陝兵所挫截回太平羣賊先後走川東德楞泰約勒保由川北至東鄉會剿適七十五敗劉朝選湯思蛟度向瑤于新寧復移軍攻樊苟鮮三賊于大竹德楞泰勒保大軍亦至三路會攻賊以川東北圍寨嚴難虜掠復窺嘉陵江七月德楞

泰遣七十五李紹祖東邀樊人傑于隣水而大軍追賊
墊江衝賊爲二乃留勒保接捕而自追其前隊冒暑馳
百七十里斬賊千有三百生禽及投出二千有三百又
敗賊于岳池之蕭家場生禽數千付勒保後營訊之降
賊與外賊夜通大譟德楞泰急分兵回救乃敗走時川
東北寨勇爭殺賊脅從逃散絡繹建昌道劉清及通判
劉星渠先後招撫二萬餘有

詔嘉獎鮮大川攻儀

隴之天旗寨爲寨勇所殲而張子聰湯思蛟頗悔罪思
降屯東鄉之前河久未焚掠勒保遣人招撫賊黨譚先
後被殺有

詔切責八月七十五敗樊人傑于隣水

大竹德楞泰敗冉天士王士虎之分隊于南江各殺賊千計七十五復追樊賊于開縣遇庾湯劉等賊四千擊斬九百餘賽沖阿邀賊于通江川擊其半渡禽斬千餘餘千賊奔東鄉後河德楞泰與勒保賽沖阿三路截擊殲庾向瑤賊全隊于崖澗其西鄉賊龍苟唐張等窺白水碕兵糧唐大信爲寨勇所殺九月德楞泰勒保追湯劉張等于東鄉後河各僅餘數百復截徐天德之黨趙麻華千餘賊于大寧老林川東肅清乃議勒保軍雲開間迎擊自楚折回之賊而德楞泰移軍川北以剿自陝折回通巴之賊與經略夾攻十月通江賊顏勝可楊開

第等望風遁回西鄉而巴州賊辛聰張世龍復爲劉清
遣鄉勇冒入其隊潰斬數百七十五亦敗之南江賊始
不敢窺嘉陵江德楞泰留七十五防川北而自赴勒保
軍會剿十一月樊徐冉張等賊爲官兵擊敗于太平皆
由城口奔陝城口據萬山中爲太平紫陽平利大寧各
賊逋逃竄德楞泰遣總兵託雲泰以兵勇三千扼之而
自繞赴川北與七十五合擊廣元蒼溪之賊賊聞大軍
至合隊五六千東竄勒保率阿哈保等邀之渠縣先截
其探騎百餘而突衝其大隊禽斬二千賊奔儀隴德楞
泰尋食馳擊衝賊隊爲三圍斬千餘斃賊首楊開第齊

國謨等惟李炳陳朝觀顏勝可魏學盛千餘賊潰遁巴
閬十二月德楞泰追賊閬中勒保追賊巴州賊合竄廣
元寧羌與七十五所擊敗之辛聰賊二千及陝督長麟
所擊回之張世龍阮正潮等賊三四千合竄川陝交界
箐內乃議勒保回川東迎擊大寧之賊七十五專剿川
北老林之賊而德楞泰追賊入山移軍赴陝其湖北之
賊自六月總督姜晟赴軍明亮與總兵孫清元德昌三
路剿徐天德于均房賊已渡陡河西犯鄖竹竄入陝留
後隊擾均州穀城詔副都統長齡以領隊大臣率
吉林黑龍江兵千有五百赴湖北軍七月明亮等邀徐

天德于南漳殺賊千餘而川東徐萬富苟文明等賊三千復東犯房縣李紹祖追擊入楚八月與明亮孫清元夾擊殺賊千餘賊夜渡陡河之黃龍灘由鄖縣竄陝復追敗于平利之汝河餘賊僅七八百明亮以有慶溥等兵迎剿卽回軍房縣禦川東入楚各賊有

詔切責

時樊冉張王等賊三路赴楚每路二千餘李紹祖敗死遠安倭什布馳援之九月明亮孫清元擊賊房縣之上龕斬賊千賊日夜西南奔欲引官軍入山而乘間竄東北官軍兩路截之偪回大寧明亮馳回二竹以防平利東竄之賊

詔以明亮前此驅賊入陝今復驅賊入

川皆出境卽塞責降爲藍翎侍衛不許奏事以長齡代
明亮統湖北軍又以協辦大學士書麟代姜晟督湖廣
十月長齡率索倫千餘騎及粵兵千迎剿高馬二賊于
洵陽復邀之白河賊分數十隊徧據險要欲使勁騎無
所施且面面可繞出我後長齡使兵據山爲四營而遣
鄉勇誘之賊下山突陣數次不動乃潛遣騎繞出賊後
夾攻大潰之先後斬賊二千殞厓死無數賊南向竹山
欲由陡河走房保我輕騎晝夜兼程七路馳擊禽斬千
有四百散脅從千計適明亮倭什布迎擊于保豐復禽
斬八百賊走還遇騎軍不敢復戰卽踰山遁弃騾馬器

械西奔洵陽白河與平利賊合長齡明亮亦兩軍合攻十一月高天得馬學禮西竄留後隊高天升千餘賊于竹谿晝伏夜出四山縱火以疑官兵欲乘間東竄孫清元長齡明亮遏之賊不復焚掠晝夜疾馳由興山直奔荆宜官軍遶出遠安邀擊而徐天德王廷詔等復爲經略大兵偪竄竹谿長齡明亮孫清元三路迎擊于房縣圍斬六百餘賊不復東竄十二月高天升樊人傑徐天德三賊合隊萬餘屯竹谿將分赴川陝孫清元扼其西南明亮長齡邀其東北合攻于太平關斬賊千計脅從逃散無數餘賊奔西南山內孫清元剿之高樊二賊奔

平利而高賊遂由洵陽冒官兵給舟渡漢北六年正月
德楞泰與經略會籌漢北分擊高天升于山陽殺賊千
有八百釋其脅從千遣賽沖阿躡餘賊而自選輕騎冒
雪繞出鎮安之北與賽沖阿夾擊禽斬大半殲賊首高
天升 詔以德楞泰迅掃巨憝與前此肅清川西同
功晉封一等子爵德楞泰復回軍漢南是月 上以
官兵勞苦五載特遣大理寺少卿窩星額太僕寺少卿
裘行簡賁銀十萬兩馳驛赴陝宣犒經略參贊兩軍并
荷包帶鉤搬指翎管等分頒將士又 詔懸賞格以

購徐天德王廷詔樊人傑三教首及高天升高天得馬

學禮屢害大員之賊其餘龍冉張苟等許降免死其禽
斬者賞次之六年二月南山賊伍懷志復糾衆三千由
五郎東奔額勒登保遣穆克登布追之冉學勝糾高賊
餘黨千餘西竄棧道渡渭而北長麟邀之隴州賊復渡
渭南而渭北又有汧陽新起之賊遣副將蕭福祿剿之
斃賊千餘生禽千有二百隕匪死者三百餘時山上多
脅從難民蕭福祿不宣諭招宥卽圍攻蹙之詔盡

釋所俘千餘降蕭福祿參將時渭北久旱詔至卽

雨而長麟所追冉賊復由唐藏黑河將赴沔略上
賁額勒登保困于南山零匪乃奏伍冉二賊賁成穆克

登布長麟兩路而自以兵三千渡西鄉與慶成迎擊高馬等賊時高馬等爲楊遇春所追犯隴不遂折而向川楊遇春繞出沔縣黃和驛長麟赴雞頭關各伏兵以待賊全出溝口哭起掩殺禽斬二千賊僅數百亡命入川楊遇春留軍休息而自選精騎并沿途抽各營兵勇追入川之賊一晝夜馳四百里賊不暇復虜掠又川中圍寨巖乃折回兩河口楊遇春由南鄭西鄉追賊回陝與慶成會擊禽斬三百生俘王廷詔搜獲畫像經卷檻送京師惟高馬二賊遁巴山其後隊留南山者亦爲長齡邀擊禽斬大半三月高馬二賊與川賊陳魏顏辛

等竄西鄉。窺江岸。額勒登保遣慶成札克塔爾兩路迎擊。先後禽斬千餘。楊遇春旋禽高馬二賊于大寧之二郎壩。俘斬殆盡。

詔晉額勒登保二等子。楊遇春襲騎都尉。乃檄遇春赴城固。洋縣擊冉賊。時冉學勝自長麟赴汧陽。後敗楊奎軍于留壩。陣亡總兵副都統以下數百。連日虜脅衆三千。騾馬二千餘。復鳴張甚。額勒登保率慶成分路趨棧道。賊已由秦州渡渭。大軍追及隴州。與長麟會剿。遏其赴固原之路。賊始東竄。四月額勒登保使長麟西北追躡。而自率大兵遶出寶雞。賊不敢東北。復渡渭南。奔棧東。晝夜疾馳。欲竄楚豫。大兵循南

山之南過其入山令慶成扼其東而賊已渡漢南乃選精騎渡漢夜襲其營潰斬三百餘散出難民七百餘賊沿江東下復思北渡爲沿江兵勇所遏遂竄巴山五月額勒登保敗諸安康賊復與張天倫習芝秀陳國奉等合屯高唐嶺衆五六千楊遇春數路趨之禽斬三千賊復分爲二楊遇春與副將楊芳等夜突襲張天倫于白河禽斬殆盡乃留札克塔爾剿張天倫而自與楊芳邀冉賊于平利其漢北之伍懷志賊爲穆克登布屢禽斬僅存千餘時南山內堡寨已密所至截殺穆克登布晝夜追捕賊僅存三百匿秦嶺老林穆克登布分兵一傍

秦嶺西南麓進一傍東北麓進一裹乾糧由秦嶺之巔
躡追皆居民樵采不到之地賊急復由孝義老林出五
郎沿途餓斃所存愈少而降賊李其貴復招出黨賊二
百餘卒獲伍懷志于層崖之上于是漢北復無賊額勒
登保奏以慶溥赴廣元防漢上游喜明柯藩等屯平利
安康防漢下游與慶成西鄉軍犄角其四川之賊自正
月德楞泰與勒保分軍後七十五擊敗川北各賊于通
江斬張世龍而樊人傑徐萬富冉天士王士虎等衆四
千爲長麟軍遏其入棧復南奔廣元寧羌刼餉械冒官
兵欲奪渡嘉陵江爲兵勇所拒轉趨儀隴下游適勒保

前鋒阿哈保等迎擊于儀隴北岸。大軍繼至，夾攻禽賊二千餘，斬徐萬富。餘賊潰遁，通江將入陝。阿哈保馳扼其去路，而劉清自巴州七十五自竹峪關合擊，殲禽二千餘。乃令總兵張志林、許文謨分防江岸上下游，而回軍川東。時劉湯、辛顏、魏陳、李等均出老林屯太平雲開間，衆八九千，攻破安樂坪、紀家寨，膚脅日衆。而川北敗賊千餘，由山林晝夜東奔，將與川東賊合。阿哈保、薛大烈等追斬其半，樊人傑跳崖遁。餘賊不敢赴川東，散竄老林。勒保檄七十五夾攻川東賊于巫山。都司羅思舉衝入賊隊，斬二百餘。忽左右山溝笑出賊三千，鏖戰，羅

思舉潰其右隊之賊左隊亦走追斬六百餘散出難民
千餘獲器械牛馬千計餘賊二千奔東鄉太平三月勒
保追川北賊自通江竹峪關奔陝復移剿川東辛湯二
賊時辛聰衆二三千屯太平湯思蛟糾各路敗匪五六
千屯大寧勒保以查勘嘉陵江爲名復回川北 詔

革職留任四月勒保遣總兵永寧等由大寧間道搗賊
巢而託雲秦扼城口截其北賊棄巢走雲陽永寧由開
縣扼其入山之路與大軍夾攻各賊敗屯大寧山中五
月勒保七十五兩路偪攻賊分竄陝楚阿哈保追入楚
七十五追入陝而勒保別剿大寧鹽場之賊阿哈保擊

龍紹周之分隊唐明萬李顯必于竹山三岔河生禽九
百漂溺千餘復逾界嶺追擊後隊于東溪河斬李顯必
殲溺殆盡時大雨五晝夜官兵阻溪漲不能渡糧盡多
餓死者七十五追冉天士于平利之大渝河先遣卒間
道據其後山偏賊出隘而伏起衝之賊爭攀崖遁斬墜
死千餘生禽九百餘勒保令七十五追剿入楚而與阿
哈保回軍界嶺與經略及長麟明亮等議攻川陝楚交
界各賊其德楞泰自二月與經略分軍後漢南賊苟文
明已竄湖北惟龍紹周屯興安之磚坪亦糾合唐張冉
李各賊萬餘東走會慶溥扼白土關乃南趨鎮坪爲川

陝楚通衢。德楞泰分兵勇八百。聲言追躡。而自由雞心嶺繞赴二郎壩待之。賊前營步騎四千。中營五千。已進和岡溪。後營三千。方攻天平寨。見軍至。卽遁。而伏千賊以截我後。乃遣賽沖阿追剿後營。遣溫春扼和岡溪口。以截伏賊。而督兵進攻中營賊于峽內。賊無走路。其脅從爭弃刀矛四散。前營賊冒死回救。賽沖阿等領勁騎內外夾攻。斬戮千有八百。生禽二千餘。墜溺逃散二千餘。餘賊數千東竄。詔以參贊威聲素著。賊望風爭避。聞前在四川與勒保軍互易旗幟。賊易而趨之。大爲德楞泰軍所破。曷仍用前計。佯爲他將之兵。以懈賊所。

謂兵不厭詐也。三月龍紹周分遣唐明萬千賊奔太平。老林欲引官兵西追而自率大隊突入楚德。楞泰邀擊于竹山之官渡河。騎賊數百先涉。餘賊數千雜沓河岸。黑夜間追兵鎗礮聲爭赴水。漂溺大半。時我兵至者僅數百。故濟岸之賊及沿河東竄之賊尙三千餘。竄回太平。書麟明亮長齡等皆馳赴參贊軍會議。初湖北賊自正月高天升入陝後。惟徐天德留楚。長齡明亮回軍與孫清元夾攻賊。西奔鄖竹。將合陝賊書麟孫清元扼吉陽關。斷其交結。長齡明亮擊苟文明李彬于竹山。轉戰一晝夜。禽斬及逃散各千。賊折赴川東。二月明亮等

軍夾擊徐賊于保康殺賊八百餘使孫清元扼霧露河
杜賊東竄是月 詔議移湖北巡撫于襄陽控制鄖

宜書麟等奏請增設湖北提督于襄陽而移襄陽鎮總
兵于鄖陽鄖陽協副將于竹山巡撫仍治武昌三月官
軍數路剿徐苟等賊于興房間先後殺賊千有三百殲
賊首張允壽允壽徐賊謀主猶張漢潮之有冉學勝也
時德楞泰所追龍紹周已入川乃使明亮北扼二竹而
自繞出興山之東與長齡夾攻時賊所竄長房河西北
老箐荒僻淤阻二百餘里無人迹德楞泰使竹山鄉勇
執參贊旗幟入山躡追而大兵由松露河繞出其前會

徐賊已出山北遁而苟賊尙未出山乃以長齡一軍伏山口邀擊而德楞泰軍追徐賊擊諸山峽禽斬千有八百餘賊三千奔上龕復爲明亮所破賊盡竄川楚交界詔還德楞泰雙眼孔雀翎時書麟卒于房縣以吳熊光代之先令長齡暫署總督事而巡撫倭什布以軍餉不給爲經略參贊劾罷以全保巡撫湖北時川陝荒歉賊艱掠食皆欲東走湖北四月徐天德與樊人傑王國賢陳朝觀曾芝秀等賊合隊德楞泰追急西竄禽斬千有八百陳朝觀爲寨勇所獲楚賊略盡德楞泰奏言臣自用兵以來三次肅清楚境而邊界綿長與其布兵

各卡力單難堵禦不如分兩路游兵長齡率孫清元領兵六千于房縣專備川賊明亮以兵六千于二竹專備陝賊與兩省追兵夾擊以剿爲堵時西竄各賊分路狂奔留後隊于峪河口綴官兵而前隊奪渡漢北將由鄖西赴河南德楞泰追及洵河扼其東北禽斬千餘賊西南奔鎮安劉之仁雒昂等扼其入山慶成復迎擊于兩河口沿途各寨截擊脅從乘勢逃散遂復折渡漢南慶成過江追擊西鄉禽斬五百餘德楞泰繼至賊僅千餘南奔川境時陝賊留楚者惟王國賢張萬林二千餘由鄖陽走房保與戴仕傑合隊長齡孫清元夾擊禽斬其

平五月德楞泰追徐天德于兩河口禽斬五百盡獲各
賊妻孥徐天德由仁河新灘奪渡中流船覆溺死獲其
屍其餘黨留漢北者至是由洵陽奪舟渡江知縣嚴如
煜率鄉勇邀之半渡覆其七舟溺賊二百餘復率寨勇
獲張天倫其樊張餘黨各一二百分竄漢江南北岸德
楞泰令慶成搜捕而自會額勒登保于平利時龍苟二
賊竄平利王國賢戴仕傑曾芝秀等在洵陽竹山辛聰
冉學勝等向白土關羣賊皆聚川陝楚邊界經略參贊
將合三省兵聚而殲之詔以明亮老病解軍事來

京又

詔各路征兵馳驅五載其傷病未愈及家無

次丁者量遣歸營別簡精銳以作士氣此嘉慶六年夏以前德楞泰與陝楚軍分合情形及羣賊偏歸三省交界之事其堡寨利害見于湖北者長麟奏言湖北用兵剿寇五載而寇終未靖蓋由賊逸兵勞制扼未得其要教匪本流賊遇食便掠遇屋便舍但持一械即可橫行非官兵必需鍋帳糧運之比敗則四竄林箐夜則舉火嘯聚多方誤我不能兼顧兵甫集而賊已遠颺兵甫撤而賊又踵至以累重之兵剿輕便之賊是以曠日無效且湖北邊界與川陝犬牙相錯二千七百餘里出川陝卽入楚出楚卽入川陝層巒疊嶂四路可通若欲無處

不防兵少則寇視之蔑如兵多則以有用之師坐困于
無用之地伏思設兵原以衛民與其孤懸戍守于荒山
絕磧中糧運險遠瘴厲不時使賊竄擾腹地而鞭長莫
及莫若酌抽山卡兵勇撥歸衝要隘口厚集其勢探有
賊蹤發兵馳往所至有兵夾擊旣無日日拔營之勞自
有節節策應之效且賊雖東奔西竄不走平原欲疲我
兵力而其蓄意全在平地掠食虜民但當併力守我有
糧有民之區偏賊歸入無食無人之地黨孤食盡自然
竄出以逸兵待困賊不難一舉撲滅湖北如鄖陽之鄖
房二竹宜昌之巴東此五縣接壤川陝屏蔽內地形勢

最重鄖縣以鮑家店爲要隘房縣以化龍堰爲要隘竹山以保豐爲要隘竹谿以峰溪爲要隘房竹交界以官渡爲要隘巴東以西瀼河爲要隘擬于六處各置步兵二千共需兵萬有二千其鄖西一縣與河南兵協堵至內郡荆襄均宜地皆平行必仿鄖竹築堡團勇之法賊卽深入數百里間層層俱有堡寨堅守無人可虜無食可掠且能堵截奔突與官軍犄角則有鄖陽邊界各邑設險環衛于外又有近邊各州縣築堡守禦于內賊不日可滅其見于陝西者巡撫台布奏言堅壁清野之策雖已奉行但村落大小不齊人戶貧富不等必須官爲

倡道臣自與那彥成倡捐勸諭以來計藍田郿鄠寶雞
商州鎮安商南雒南孝義五郎等廳州縣共築寨堡五
百四十一處其間民修者五之四官助者五之一老弱
財物盡移寨中惟是大寨僅能自衛小寨尙難固守且
堡寨高踞山顛不能不下山汲水貿易耕作間或猝遭
虜脅而小民恐賊破寨間有擲給米糧情非得已難遽
治以濟匪之罪此亦百密之一疎迥非從前任賊焚掠
之比至漢中二棧爲軍餉要道自以擇地築堡存貯糧
硝爲上策因于寶雞鳳縣留壩褒城寧羌各驛親爲相
度先築江口一處教以取土壘石因利乘便之方堡周

三里牆高二丈廣丈有二尺崇墉屹然軍糧山積居民爭徙占地營屋其餘九處經費相仿總不出五千兩其渭河西北亦經督臣長麟勸諭辦理又陝撫陸有仁奏言築堡團勇之事川陝情形不同四川地居天險如大成寨大團包方山坪等寨每處可數萬人其小者亦數千人賊據之則可抗官兵而百姓守之亦可拒賊若南山內層巒疊嶂并無寬敞環抱之所止能于陡險山巔就勢結構每寨止容數百人至千餘人不等蜀山多膏腴稻田民居稠密其勢易合陝西老林惟棚民流寓零散墾種隔十餘里數十里始有居民十數戶若糾合數

村共築一堡則南村之人欲近南修築北村之人欲近北修築惟秦隴以西人皆土著無不踴躍興工秋間賊入棧西每以彼此各不相犯婉求各寨而寨民必乘間截其尾隊奪其牲畜不使晏然空過其西安同州鳳翔三府與漢南附近川省之區皆多土著審利害每邑結有堡寨或百餘或數百其漢北山內近亦一律興工又恐結寨後民丁但知守寨而于賊出入要隘轉無堵禦復令于堡寨之外每寨撥數百數十人合力守卡以杜窺伺請將五郎孝義藍田盤屋鄠縣五處責成臬司商州鎮安山陽雒南商南五處責成潼商道平利安康白

河洵陽紫陽五處。責成候補道。石泉漢陰城固洋縣南鄭西鄉五處。責成延榆綏道。鳳縣留壩褒城沔縣寧羌略陽六處。責成陝安道。刻期完竣。是時陝甘修寨團練。日密。賊勢日蹙。陝督長麟以團練有益。于今日。大有害于將來。民氣日趨強悍。或聚衆械鬪。抗官拒捕。不可不防其漸。請乘此時。令委員借散硝丸。監操演爲名。稽查礮銃刀矛實數。逮賊氛一靖。無難按籍而稽。詔以安民必在擇吏。誠得良吏。自可鑄劍戟爲農器。否則斬木揭竿。豈條例所能禁止。況山谷居民。捕鳥獸。備虎狼。不可無兵。其擇良吏善行之。以收銷兵實效。其後凱旋。

鄉勇由官給價購收鎗矛果盡繳無事云

嘉慶川湖陝靖寇記六

六年六月額勒登保奏言川陝各賊除冉龍戴苟湯劉等尙自成隊其餘辛聰王國賢張天倫及樊徐餘匪大率皆官兵剿敗之餘延喘山林有此隊入彼隊者有數隊合爲一隊者無定名亦無定數目前陝中已無大隊之賊皆竄匿萬山老林寨堡較少之地陝剿急則入川楚楚剿急則入川陝由賊中掌櫃元帥外尙有總兵先鋒等目一經剿散則其總兵先鋒又各自爲首而首逆轉莫測所向卽殲斃首逆而去一人復立一人并非賊黨外有所增益至其黨與人數往往彼賊附入此賊則

此賊之數驟增被剿潰散則數又驟減合計不過二萬四千餘人此時堡寨完固卽有耕耘貿易猝被虜掠之人皆能乘間逃出不爲賊用而各路兵勇十倍于賊屢次斬獲自必有減無增業已偪賊入川爲一舉掃蕩之計是月經略參贊會議于平利德楞泰由西南偪攻而額勒登保由東北邀擊會剿于三省之交適龍戴等賊復分二隊額勒登保追戴仕傑等入陝而德楞泰七十五追龍紹周入川七月德楞泰邀賊太平開縣老林先後殲賊二千又遣降賊回營招撫散出脅從二千又寨勇沿途截殺僅存千賊八月復追諸大寧山內殲其七

百僅餘數百。賊東走巫山。而官兵暑雨崎嶇山箐。病留各寨者亦千計。乃休兵大寧。搜捕近邊。而令賽冲阿等追賊。斬龍紹周于平利。盡殲其衆。時賊數愈少。奔愈捷。每望兵卽逃。德楞泰乃分選兵勇。每二百爲隊。冒教匪服色旗號。以降賊爲鄉導。或佯與合隊。或乘夜襲營。各給護牌爲驗。且密諭民寨。無論兵賊皆不許入堡。但協力截擊。賊勢日蹙。乃使薛大烈等分追湯思蛟。劉朝選于太平。而馳會額勒登保。保于通江。額勒登保自七月追戴仕傑。由安康至太平。適楊遇春追冉賊。由大巴山老林至大寧。其冉賊分隊。張天倫、曾芝秀等亦踰

界嶺入川。額勒登保以川陝楚各賊皆聚川境，乃令慶成、喜明等嚴防漢江南岸，而與楊遇春分路入川。楊遇春殲禽冉天士、王士虎于簡池壩。八月，額勒登保遣楊芳等擊張楊二千賊于西鄉，遣穆克登布擊戴仕傑後隊于平利，皆俘斬千計。各賊僅數百竄老林，而通江賊李彬衆三千與慶成、楊遇春所追高見奇、魏學盛、辛斗等賊及楊芳等所追太平、開縣之賊均至南江。東西分遁。額勒登保令慶成搜賊南江老林中，令楊芳等殲東奔之辛斗于通江，而自率楊遇春追西竄之高魏等于廣元。十月，川北各賊均思西竄，穆克登布遣兵迎擊高

見奇于紫陽禽斬殆盡額勒登保督楊遇春剿魏李等賊于廣元蒼溪賊狂奔巴州敗田朝貴之兵官兵間道邀擊達州禽斬千餘賊分竄一冉天璜七百賊奔東鄉太平楊芳等殲之一李彬數百賊遁西鄉將與樊苟辛聰合楊遇春殲之其勒保一路自六月督阿哈保等殲鮮苟等千賊于東鄉託雲泰亦敗太平賊于城口會參贊兵追賊回川東乃詔勒保專辦川北七月陝賊高見奇竄川北由閬中蒼溪昭化屢窺嘉陵江不遂遂與魏學盛賊千餘合竄棧道官軍邀之百丈關禽斬七百賊復合冉學勝于南江勒保蕭福祿等三路合攻禽斬

九百餘生禽冉學勝

詔封勒保三等男阿哈保等

賞賚有差八月遣兵追高見奇于西鄉而自剿魏學盛于南江老林先後禽斬五百適通江賊李彬糾各路敗匪二千復至巴州乃移兵遏其赴嘉陵江之路其七十五所迫湯劉等賊禽斬千餘僅數百賊走東鄉復與苟文明合衆二千將竄陝八月七十五擊苟賊于大寧斬其半俘其家屬而湯劉殘賊復乘間奔大竹勒保馳防江岸二賊旬日已脅衆四千餘騎千餘分擾墊江鄰水乃令田朝貴趨隣水阿哈保趨墊江而勒保由大竹三路偏賊復歸一隊追擊于達州禽斬五百散其脅從二

千賊復走還太平。竄西鄉。薛大烈追敗之。截回川境。十月慶成殲張天倫千餘賊于廣元。復遣兵助慶。薄遏高見奇。西竄黑河之路。餘賊數十遁老林。穆克登布亦屢殲平利安康之賊。敗匪輒逼回川。而湖北之賊自六月內全保長齡孫清元等與七十五三路截擊。湯劉辛張邀其竄東湖保康之路。賊西竄入川。而七十五所擊之龍戴二賊。長齡孫清元全保會剿之。曾辛等賊皆先後分竄川陝。于是楚境復無賊。十月詔以經略參贊奏報賊數。惟湯劉李苟樊戴六賊尙稱大隊。每隊不過千餘。均偪入四川界內。并其餘竄匿陝楚無名之賊。統

計·不·過·一·萬·有·奇·而·經·略·在·川·北·參·贊·在·川·東·勒·保·界·
在·中·間·限·期·今·冬·掃·蕩·額·勒·登·保·奏·言·剿·大·賊·易·爲·功·
剿·小·賊·難·爲·效·目·前·除·各·老·賊·數·隊·外·其·餘·孽·散·逃·深·
山·老·林·間·雖·總·計·尙·可·盈·千·而·分·竄·皆·不·滿·百·不·值·以·
七·八·萬·官·兵·搜·捕·應·俟·各·大·賊·已·除·先·酌·徹·回·滿·漢·官·
兵·各·盡·本·省·兵·力·今·本·省·提·鎮·分·地·搜·除·其·堡·寨·鄉·勇·
則·分·派·道·府·率·同·州·縣·或·以·數·十·寨·聯·爲·一·處·而·臣·于·
各·邊·適·中·督·辦·兵·力·所·不·到·則·以·民·力·佐·之·民·力·所·不·
及·則·以·兵·力·佐·之·剿·撫·兼·施·以·期·殄·盡·詔·以·經·略·
調·度·有·方·將·川·陝·十·餘·萬·賊·掃·除·殆·盡·僅·存·十·分·之·一·

宜先施懋賞。晉封三等伯。德楞泰功在川西。屢殲渠魁。晉封二等伯。穆克登布賽冲阿温春。均賞騎都尉。世職。其軍機大臣慶桂。董誥。戴衢亨。交部議敘。十一月。

詔曰。川陝楚軍務將竣。其善後事宜。莫若扼形勢爲控制。近日湖北襄陽。已增提督。陝西五郎。已增總兵。固原提督。亦議移漢中。至湖北竹谿。距四川之大寧。陝西西鄉。距四川之太平。東鄉。各七八百里。或千餘里。地廣兵希。向爲奸宄出沒之所。如有今昔異形。必應增改之處。會籌以聞。其三省可墾荒地。及銅務鹽務。有便于民。無害于官者。量爲措置。額勒登保奏以太平界川東北之

中請設太平協副將而移舊都司于城口其廣元之黃楊堡通江之竹峪關大寧之徐家壩巫山之大昌皆踞萬山中應各設守備其達州改爲綏定府太平縣改直隸廳同知其東鄉之南壩地當通衢涪州之鶴游坪武縣之大印山皆周數百里居民數萬戶應設州同主簿各一又乾隆中移綿州治于羅江去年賊渡嘉陵江居民連夜修築舊城賊至無患應移綿州復舊治是月額勒登保德楞泰勒保會于通江經略參贊卽移軍川北而勒保赴川東時川東各路敗賊竄老林者冰雪凍餒分出掠食百十爲羣或有賊首或無賊首諸將各有斬

獲惟川北賊苟文明糾合高丹姚餘匪衆尙二千餘騾馬數百晝夜西奔七十五以兵疲就餉太平六日賊已渡嘉陵江上游之略陽河直赴階州慶成七十五先後馳擊額勒登保復令楊遇春兼程赴之并檄嚴守白水江扼其赴川西之路賊復折奔東南時德楞泰方敗苟賊分隊張天倫于蒼溪禽斬大半令田朝貴追之南江而自迎擊苟賊于廣元賊已虜脅三千餘十二月德楞泰敗賊通江斬獲千餘盡獲其騾馬斃苟文舉苟朝獻額勒登保扼竹峪關遏其北竄賊奔開縣大寧老林李彬餘匪亦歸之德楞泰兼程邀其入楚七年正月德楞

秦三路追苟賊于開縣。生禽七百餘。僅千賊奔老林山。深雪厚。民皆入寨。數百里無人烟。賊盡宰騾馬爲乾糧。縊死林中者數十。額勒登保馳赴西鄉。遏其北竄。德楞泰使薛大烈追苟賊。與經略軍夾擊。而自回剿川楚交界餘賊。額勒登保邀苟賊于紫陽。賊竄西鄉。官兵一日馳二百里追之。賊已改趨白沔峽。夜渡漢北。官軍僅追殲其後隊二百。

詔以額勒登保徹防江兵勇移于川陝邊界。及是復追賊落後。致渡漢北。竄南山。奪其伯爵。降爲一等男。并褫雙眼花翎。賊晝夜西奔。與續渡江之宋應伏數百賊合隊。敗副將韓自昌之兵。額勒登

保薛大烈兩路追之。楊遇春追辛聰賊黨。劉永受亦自秦嶺驅偃而西。三路會剿。

詔德楞泰以參贊爲成

都將軍。專搜陝川。楚餘賊額勒登保以經略爲西安將軍。專搜陝西。餘賊二月額勒登保令薛大烈搜老林。自北而南。偃賊出山而伏。兵光頭山以待。賊探知東南有兵。復折竄太白河老林。乃令薛大烈回川。蕭福祿回漢南。而檄楊遇春移剿。苟逆時南山中賊劉永受爲楊遇春斬。賊僅存百人。而宋應伏三百賊亦與苟賊分隊。西竄棧道。三月三賊聞楊芳慶溥兩軍扼其西。復自華陽合而東。竄官兵數路追截。復踰秦嶺北遁。時賊久困老林。

每思出掠糧。畏官兵四面截捕。每屯高山巔遙望。軍至卽遁。札克塔爾等以圍堵非計。乃佯撤辛口峪之兵。以誘之。驍賊數百果出掠。伏兵禽斬數十。復遁入山。賊遂全隊晝夜南竄。官兵扼其東西北三面。驅偪而南。及鎮安界。官兵會擊。禽斬三百餘。復竄而北。爲官兵所扼。乃竄上山巔。無路之處。蟻旋北遁。四月

詔曰。額勒登

保自用兵以來。從未有老師若此者。捕賊如捕鼠。當其出穴而捕之。今困賊山內。仍不能絕其糧。賊屢欲竄。棧西何不縱令出山。西竄而我以十餘倍之兵蹙之于平野。額勒登保奏言。賊皆徒步。知四面皆兵。一出平原。必

爲勁騎所蹙。始終不敢離老林。屢爲官兵驅逼出山。旋復竄入。五月。上切責額勒登保。札克塔爾。曠日持

久。無方略。均革職留任。又

諭額勒登保。徧訪將士。

獻禽渠之計。並懸重賞購募。如前購徐王高馬之例。限六月內。減賊。六月俘苟賊妻子餘賊三百人。由孝義竄泰嶺。楊遇春知老林無食。設伏要隘。以待賊果西竄。途虜居民知有伏。復折竄老林。額勒登保奏請展限一月。七月。苟賊復分三百賊爲三路。遇林徑錯雜。或徧踐足迹。或亂擲衣物。以疑官兵。官兵以獲賊爲嚮導。斬其先鋒王世貴。賊復分百人爲數路。散竄老林。我兵皆欲禽

賊邀賞亦百十爲隊冒雨潦深入絕壑窮崖無所不至
先後搜獲十人十餘人不等最後斬苟文明于花石巖
時上幸熱河適捷奏至詔還額勒登保三等

伯賞還雙眼孔雀翎

命移軍湖北與德楞泰會剿

德楞泰自二月剿賊巴巫令副都統豐紳以兵二千登
舟東下邀其東竄盡驅巴巫各賊而西勒保賽冲阿張
續等三路迎擊新寧大竹間禽斬大半三月張長庚陳
自得殘賊走夔州爲七十五斬捕惟宋國品張簡二黨
尙出沒東開間川東賊不及千乃令豐紳赴川北助剿
張魏七十五屯川東備陝楚邊界各賊勒保督田朝貴

薛大烈張志林等分按東開雲萬太平而賽沖阿溫春
隨德楞泰赴楚時湖北賊糾合數千其老教樊人傑戴
仕傑爲掌櫃而曾芝秀王國賢崔宗和胡明遠四賊主
戰全保長齡遏其東竄賊折犯二竹趨陝遇穆克登布
迎擊于平利乃東趨東湖穀城德楞泰使鄉勇數百多
張幟聲言大兵追躡而自率將士輕騎倍道邀賊東湖
之霧露河以千兵扼溝口伏賊而督兵三路仰攻雞公
山禽斬七百餘賊折回興山沿途逃散餘賊不及二千
而巴東賊蒲景等五千餘聞參贊兵追賊西行卽分千
賊綴孫清元軍而大隊突渡霧露河德楞泰乃使長齡

孫清元合剿樊曾餘匪而自追蒲景于房縣五月及之大埡口恐賊遠颺乃分兵扼其東南又多留帳幕以綴賊而夜繞百餘里出山後乘雨霧突襲其巢又追破之興山禽斬逃散僅千賊分竄適長齡孫清元所追樊戴等賊又分二路戴崔胡走東湖副將李天林剿之樊曾王由均州西竄德楞泰乃令副都統色爾滾總兵蒲尙佐以兵二千追蒲景等而自迎擊樊曾三賊于房竹界之官渡河時久雨山潦暴發官軍步騎相間拽尾亂流數十里追及于白鐵峽乘霧繞據山頂四面偪賊盡入峽內無走路前惟阻一河盛漲如雷樊人傑曾芝秀冒

死赴之急溜怒濤中無一免者其前過官渡河之王國
賢賊數百亦爲穆克登布遣兵所破乃令孫清元德昌
搜二竹之賊吉林泰李天林搜東湖歸巴之賊而自與
長齡賽冲阿移剿蒲天寶于興山 詔以德楞泰旬

日連殄三寇晉封三等侯六月蒲景等糾各敗賊奪據
興房交界之鮑家山周三四百里糧富寨峭守嚴德楞
泰置大營東北以綴其前又令守隘鄉勇多張幟聲礮
爲疑兵賊莫測所以忽一日黎明寨內殺聲四起天降
地出走徑皆已自剗絕擠厓隕壑趾頂相接蓋色爾滾
蒲尙佐以精兵千開箐取道援藤絕壁繞出賊巢之上

矣。餘賊七八百盡竄老林。乃分兵勇扼其入鮑家山及入陝之路。追搜大寧各箐。數晝夜禽斬殆盡。獲蒲天寶屍于崖樹。適額勒登保亦殲。苟逆于南山。于是陝楚兩劇賊皆平。其川北張魏二賊自三月與田朝貴相持廣南通巴間。屢挫官軍。及朱槐蕭福祿羅思舉等奉經略檄至始東竄。官軍追殲之。開縣勒保乃令田朝貴羅思舉扼竹峪關。擊自陝竄川之賊。四月羅聲臯殲度向瑤于東鄉。張績殲徐天培于豐城。田朝貴殲李彬餘匪楊步青于通江。豐紳劉清破張魏餘匪于廣元。于是川北無賊。其川東之湯劉張子聰等餘匪數百四竄山林。官

軍搜之。寨勇截之。無暇虜脅。所禽斬皆老教真賊。勒保乃率張志林東赴夔門。以防川楚邊界。五月熊翠熊方青六七百賊掠巫山。劉朝選四百賊掠奉節。時各賊因楚兵剿急。先後竄川。勒保檄巫山大寧兩路分剿。羅思舉殲劉朝。選羅聲。臯殲賴飛龍。晉封勒保一等男。其漢南之賊自川北竄入者。則慶成剿之。殲張魏餘匪于棧道。自川東湖北竄入者。則穆克登布剿之。并不時鵬剿太平大寧及二竹之賊。是月額勒登保德楞泰奏言。本朝用兵準回兩部。大小金川。從無鄉勇之事。自征臺灣苗疆教匪。皆剿內地亂民。與外藩不同。必使良民自保。

不爲虜脅而後可孤賊勢且防江守城堵隘亦無如許官兵是以嘉慶元二年間四川應募鄉勇至三十餘萬其間流民不過十之一二且以本地之人爲官兵哨探鄉導免爲賊用故全川得以保護自勒保再至川後賊勢日綱先後裁汰僅存萬餘不及十分之一從未有因裁鄉勇激變之事目前統計川陝楚鄉勇不及二萬皆土著有業之民事竣必不願入營伍惟隨征鄉勇萬有七千多外省無業流民其有家可歸者十之二三願入伍者不下一萬近議湖北增兵三千五百陝西增兵六千四川增兵千共增兵萬餘請卽以安置無業鄉勇無

煩招募其願歸籍者善爲賫遣以卹義勇銷後患八月
詔以南山餘賊責總督惠齡提督楊遇春專剿時
長齡病回京 命慶成代之以副都統格布舍代慶

成九月額勒登保赴竹谿與德楞泰吳熊光會議時德
楞泰破熊方青千賊于大寧遣賽沖阿追入陝而自移
剿戴崔胡六七百賊于房縣截擊逃散僅存百餘竄老
林穆克登布復破王國賢餘匪于平利追入川 詔
德楞泰專搜楚賊額勒登保專搜陝賊十月德楞泰遣
蒲尙佐富僧德殲戴仕傑于興山禽崔連樂崔宗和于
房縣殲陳仕學于巴東乃分兵搜巴巫餘匪而自扼界

嶺策應時楚賊略盡其南山遺孽宋李陳靳二張等爲楊遇春楊芳分兵十餘路櫛比排搜亦所餘無幾惟入川之賊不下二千額勒登保乃令楊遇春移師寧河以防川北折陝之賊而自與穆克登布分道入川別留格布舍兵千餘聲稱經略大營屯鎮坪以防川楚餘匪時川北則羅思舉禽張簡湯思蛟于東鄉川東則豐紳桂涵殲羅半年李世品于梁山太平又張長青百餘賊乞降于雲陽其餘散匿山林不過各十餘及數十人已無百人之賊而楚賊樊曾餘匪齊國典衆千餘由大寧竄入梁萬又王國賢餘匪四百唐明萬三百亦先後竄川

勒保檄諸軍分路剿之。羅思舉禽唐明萬穆克登布。亦由西鄉迎剿入川。會擊齊賊于通江。禽斬逃散餘三百。賊竄通南。羅聲臯武隆阿殲之。并禽景英。上以大

功將竣。先復額勒登保三等侯。時額勒登保屯西鄉太平邊界。勒保屯東鄉開縣間。德楞泰亦由巫山入川。將三路偏賊歸開。太大寧間聚而搜捕。其南山餘匪苟朝九爲楊芳雒昂剿急。與前竄寧羗之宋應伏二百賊合竄漢南。官兵追之川陝。楚首逆已盡。惟殘匪千餘歸于善。後事宜籌辦。十二月經略參贊會同川督勒保陝督惠齡湖督吳熊光以大功戡定。遵旨不用紅旗用

黃表朱裏摺六百里馳奏

詔三省蕩平上終

先帝髦期未竟之志祭告

裕陵宣示中外晉封額

勒登保一等威勇侯德楞泰一等繼勇侯皆世襲罔替

並加太子太保

授

御前大臣

賞用紫韁

勒保一等伯明亮一等男賽沖阿楊遇春世襲一等輕

車都尉其親王軍機大臣戶兵二部及各省承辦軍需

之督撫司道

錫賚有差遣官祭告川陝河湖四省

山川神祇又

詔四川湖北陝西甘肅河南被賊各

州縣自元年至七年帶征緩征逋欠錢糧普予豁免與

百姓休息

嘉慶川湖陝靖寇記七

是時三省雖靖山林邊界尙藪逋逃詔以大病雖

愈瘡痍未復命經略參贊毋遽來京而諸帥亦鑒于明
季李自成爲陝兵剿敗僅餘十八騎亡命山中逾年復
糾衆出山大猖獗是一賊不盡皆足滋蔓于是額勒登
保屯西鄉扼川北賊竄陝之路德楞泰屯太平大寧扼
川東賊竄楚之路而勒保往來東鄉新寧堵南竄腹地
之賊其楊遇春所追漢南之宋應伏苟朝九復糾巴山
餘匪分隊入川八年春額勒登保使楊遇春迎擊楚匪
于塽坪而自督羅聲臯等剿苟賊于通江使穆克登布

殲姚馨佐陳文海于南江。姚馨佐姚之富之子也。而南江復有宋賊出歿。其黨馮天保余佐斌熊老八等皆百戰猾賊。誘官兵入林搜捕。而突出格殺。穆克登布中矛死。穆克登布與楊遇春俱爲經略左右翼長。每戰輒冠軍。年三十餘而殞。額勒登保痛惜之。斬先退親卒以徇。

詔世襲輕車都尉。三月羅聲臯追賊東鄉太平。額勒登保邀其東北。賊復西竄。兵進亦進。兵止亦止。官兵屢禽斬。尙餘四百。苟朝九詭死。使靳思慶趙金友領其衆。齊國典亦投之。其田朝貴剿宋逆餘匪于開縣。斬馮天保宗賴子。皆戕穆克登布之賊。惟熊老八余佐斌率

百餘賊遁太平東鄉老林復敗富僧德蒲尙佐之兵官
并死者十餘四月苟逆餘匪復分二隊齊斬百餘賊東
走太平羅聲臯等追之趙金友三百餘賊北奔陝窺漢
江額勒登保邀擊冒雨晝夜分路搜捕先後禽斬殆盡
西鄉近川界數百里已無賊復集兵勇回搜開縣太平
五月田朝貴羅聲臯等斬靳思慶于太平六月禽趙金
友于大寧又參將陳弼報禽熊老八于太平傳首京師
以祭穆克登布之墓其德楞泰川東一路自正月王國
賢二百餘賊陳雲三百餘賊又龍熊賊黨劉學禮等糾
零匪及散遣鄉勇七百先後竄巴東時慶成養傷襄陽

詔德楞泰赴湖北。閏二月，德楞泰襲攻劉賊于老鴉寨，斷其走路，蹙諸當陽河，禽斬漂溺僅竄遁二百。追殲之竹山。三月，陳雲與苟朝閣、呂宗明合隊六百走房縣。慶溥、吉林泰剿之，兼禽樊戴餘黨胡明遠于房縣。其富僧德蒲尙佐所搜太平、大寧之賊，亦先後奔楚。德楞泰乃自川東移剿。四月，張瑗、李天林偪兩路賊入川。其慶溥及吉林泰所追二隊禽斬逃散外，各存百餘。合計興巴之賊不過三百。德楞泰乃奏將各路分捕之兵再分多路裹糧五日，會哨排搜，令其具結保無遺匪。以巴東、賁、吉林、泰、竹谿、賁、慶溥、房縣、賁、李天林、巫山、賁、蒲尙

佐大寧責豐紳其豐溪平利各處責楊遇春 詔川

陝仿行之時川賊之就撫者賴應舉降于達縣廣元賊
青藍黃號降于劉清王國賢黃國隆黃朝舉申三亨王
相胡大年等先後降于雲陽 詔獎雲陽知縣梁敦

懷招撫之力又參將桂涵殲湯劉餘黨宋國品于大竹
副將馬元殲唐大信黨百餘于開縣其漢江以北南山
餘匪楊芳屢次捕斬僅三十餘賊乃分兵勇五路排搜
自東而西自南而北或數日不見賊踪額勒登保奏言
陝境已無賊惟楚賊僅二三百川賊山內山外亦各二
三百皆散竄延喘其勢已成咽喉匪擬別籌變通之策六

月額勒登保與勒保會于開縣督諸將分二十餘路排
搜老林而西先後復禽斬二百餘各寨勇亦沿途截殺
德楞泰亦掃蕩川楚邊界各賊移師入川七月額勒登
保德楞泰勒保奏報三省肅清官兵凱旋 詔德楞
泰入覲額勒登保留搜餘匪俟德楞泰回川後再還

朝奏凱德楞泰奏湖北搜捕分六段防哨總歸慶成
統之額勒登保奏四川分六段歸勒保統之陝西分八
段自西鄉至寧羌七百里將軍興肇統之自西鄉以東
至安康千餘里楊遇春統之時各營所撤隨征鄉勇每
人以銀五錢繳刀矛銀二兩資回籍皆驍桀亡命無家

可歸多勃鬱山澤間而太白山老林深奧爲官兵未搜之地亦匿百餘賊至是六月楊芳搜至其地匿匪遂突出蓋屋洋縣楊芳追之入山八月副將吳廷剛所散鄉勇百六十人遂入賊黨合隊三百苟文潤領其衆詭稱馬姓虜掠四出復猖獗九月楊遇春兵由洋縣入山額勒登保渡江督之賊東奔鄖陽不遂遂由石泉七星壩竄渡漢南赴西鄉復糾巴山老林餘匪及通江已散鄉勇衆五百戕副將朱槐于山溝詔楊芳回漢北防山內餘賊十月德楞泰出都詔額勒登保還朝以餘匪付德楞泰搜捕時楊遇春邀安康平利他賊亦追

入川時賊皆百戰之餘。猱騰隼鷲。具悉官軍號令。及老林徑路。忽陝忽川。忽聚忽散。屢被圍復。乘霧溜崖。突竄有中。數矢猶力。戰者分軍遇之。則不利。大隊趨之。則免脫。僅餘二三百賊。而三省不得解嚴。十一月德楞泰剿賊山中。忽我前隊鄉勇旗幟不動。致陣亡副將以下數十。詢知賊中多舊充鄉勇。與我鄉勇相識。相訴故。臨陣觀望。會藍翎鄉勇魏中才等請赴賊營招諭。德楞泰遣之。竟爲苟文潤所殺。

詔懸賞購賊如前。購捕苟文明之例。九年正月賊屢由安康窺漢岸。欲竄南山。皆爲楊芳兵勇所卻。其分隊王世貴百餘賊亦由平利竄川。

賽冲阿追之楊芳復屢禽山內餘匪百餘于是南山無
賊惟嚴防漢江北岸二月額勒登保復出都以
欽
差大臣赴陝德楞泰圍賊太平之百里荒四面設卡層
層進逼賊屢乘霧突圍不能出復縱絕壁宵遁與滄石
河匪匪合隊五百竄界嶺老林諸軍會攻于竹谿三月
又追擊于平利禽斬百有四十餘賊三百奔化龍山老
林爲從來各賊未涉之境又時冒兵勇商民誘破小寨
掠糧東西無定諸將士皆棄帳裹糧步追而從征八載
久役思歸四月額勒登保出興安渡江督師乃先汰遣
疲病兵勇復下令凡士卒禽一賊者卽優遣回籍分兵

五路人自爲戰并伏兵各寨以備攻寨掠食之賊賊奔
太平大寧人川復增糾散遣鄉勇二百五月 上切

責諸將老師持久降謫有差而暑雨時行山潦暴漲兵
與賊皆不能進額勒登保德楞泰楊遇春皆病六月
詔額勒登保回京以 欽差大臣關防交德楞泰

剿賊于川陝界之鳳皇寨禽斬百有六十尙餘二百賊
楊遇春邀之平利復折回化龍山八月賊黨趙洪周聞
購捕之令乘間斬苟文潤出降餘黨解散乃令楊遇春
賽冲阿兩路入山搜捕而楊芳搜漢北豐紳馬瑜田朝
貴三路分搜川境先後禽斬無虛日會寨勇禽苟朝九

于南鄭羅思舉禽王世貴于太平各路皆報肅清九月
班師 詔德楞泰回成都將軍之任蓋自奏報戡定
後以散遣鄉勇激變復勞師二載數百賊當數千萬賊
剿數萬兵當數百兵用故附著之以見寇無衆寡患無
小大云時長麟奏善後事宜議收器械毀堡寨勒保奏
言川民廬舍皆與田畝相連多散少聚自賊氛日熾民
皆圍築高險大寨以自守衛而別分小寨于平地以便
耕作貿易皆迫不得已自戡定以來爭還平地故居并
無戀據險阻之人不俟官爲散遣間有近田畝成村落
者原可聽其安聚卽如東鄉太平各縣皆有前明古寨

卽昔人避流寇之所若慮其藏垢納汙悉勒除毀非特
勢所難行亦可不必惟有設立寨首仿保甲之法約束
民戶禁習邪教則守望可以相助于誥奸興教兩益白
賊起事至再報戡定計先後用兵九載費帑銀幾二萬
萬兩所奏殺賊數十萬計而官兵鄉勇之陣亡與五省
民之罹毒者無得而稽焉

臣源曰以今準古方域陝西雍州四川益州而漢中興
安則華陽黑水梁州之域自古別爲一道明代嘗置鄖
陽巡撫以統治之界以漢沔夾以南山巴山襟帶背負
據秦隴楚蜀之交旁薄二千餘里多材木竹箭五金百

穀流毗姦宄之所托命天下有事常先叛後服山四省犬牙相錯出此入彼且建官少距都會遠聲教所不暨控馭所不周也當軍興之際天子蒿然議移巡撫

移提督屢下廷議或可或否愚以爲宜割四川陝西湖北山內之地設置行省以巡撫兼提督建闢興安居中控制西枕漢中府而割寶雞秦州徽縣兩當以屬之東抵鄖陽府而割興山南漳巴東歸州以輔之東北屏商州雒南而割孝義寧陝二廳以屬之南屏綏定府而西南割寧羗南江通江東南割太寧等以屬之其衰僻寥濶之區非徒增營汛且必增州縣使有城池解署學校

倉庫監獄無事得以編保甲司教養銷非僻于未萌一旦偶有反仄蠢動專聞大吏朝發夕至朝撲夕滅責專權一庶鞭長而肘不掣蔓圖而原不燎秦隴楚蜀豫間不致常以腹心茹蠱虺庭闔參封豕于古者邦國封域形格勢禁之誼尙或有取焉或曰王化之本在京師春秋之誼詳治內略治外故安民在乎知人而建置抑其標末也

嘉慶畿輔靖賊記

國家自嘉慶七年川陝戡定十三年靖閩粵海寇十六年辛未春天子方舉西巡狩之典幸五臺示得意而有星孛紫微垣占主兵越二年則有天里教匪之變天里教者亦名八卦教聚衆斂財愚民苦胥吏者爭與焉而河南滑縣李文成直隸大興林清爲之首方是時溫承惠總督直隸高杞巡撫河南同興巡撫山東文成各賊益妖煽其衆指星象應在十八年秋九月十五日午時文成黨數萬最盛而清則密邇京邑賄通內侍外倚文成之衆爲援將乘駕幸木蘭秋獮回鑾時伏

莽行在謀定而中外莫知也。秋滑縣知縣強克捷聞之，密封白高杞及衛輝府知府郎錦騏請兵掩捕，皆不應。克捷乃捕李文成下獄，刑斷其脛，賊黨以事迫不能俟期，遂于九月初七日聚衆三千破滑，出文成于獄，強克捷死之。於是直隸之長垣、東明、山東之曹定、陶金鄉同時殺官圍城，而曹定、陶皆破。事聞，命溫承惠會同高杞同興討賊。諸賊旣倉皇起事，遂不及赴。林清外應之，約林清及期則使其黨二百餘輩由宣武門潛入內城，藏兵械混酒肆中。日晡分犯東華西華門，白帕其首爲號。太監劉金等引其東，高廣福等引其西，闖進喜等

爲內應而清白居黃村尙覬河南賊集而後進時東華門甫入數賊卽爲護軍關門格拒奔散其入西華門者八十餘賊反關以拒官兵賊得內監鄉導已知大內在西而誤由尙衣監文穎館斬關入侍衛急閉隆宗門賊至不得入總管太監常永貴縛由東華門入之二賊于蒼震門 皇子等在上書房聞變 皇次子急命進撒袋鳥銃腰刀 命諸太監登垣以望賊俄有手白旗攀垣將踰養心門入者 皇次子發鳥銃殪之再發再殪貝勒綿志亦以銃殪賊賊乃不敢越垣而進將火隆宗門而留守京師諸王大臣率禁兵自神

武門入衛。敗賊中正殿門外。薄暮忽大雷電。數賊震死。武英殿之御河。餘股栗竄匿。先後就禽。并禽通賊諸內監十六日。皇子諸王大臣皆飛報。行在初。

上行獮至伊瑪圖將進哨。忽山潦驟發。遂旋蹕。

命皇子先歸。故得靖內難。及得警報。則駕已。

至白淵時。京師連日大風揚沙。晝晦。謠言四起。驚。

擾達旦。十七日。上自白淵回驛。駐煙郊。下詔。

罪已。并責中外諸臣泄沓尸素。致釀漢唐宋元明以來。

未有之禍。以功封。皇次子智親王貝勒綿志進郡。

王銜諸大臣賞黜有差。以尙書英和代吉綸爲步軍統。

領是日禽林清于黃村十九日

駕自煙郊還宮人

心始定焉

上御瀛臺親訊首逆及通賊太監皆磔

之傳首畿內李文成既據滑以脛創甚不能出四方爲
流寇遂出兵圍濬而萃精銳于道口鎮道口距滑十八
里臨運河有積糧賊恃以戰守且爲長垣東明曹定陶
金鄉諸賊號召時溫承惠督兵大名巡撫高杞軍濬皆
按兵不動而山東巡撫同興聞報踰旬不發兵鹽運使
劉清力爭始發乃詔以陝甘總督那彥成代溫承

惠佩

欽差大臣關防節制山東河南兵剿賊陝西

提督楊遇春副之又調滿洲健銳火器營兵千及西安

徐州兵數千。十月楊遇春至衛輝。卽日率親兵八十由運河西進。覘道口。遇賊數千。卽大呼突擊。賊辟易。追渡河。禽斬二百餘賊。敗入道口。遇春出陣數親兵。少二人。復衝入賊隊。奪還二屍。賊衆奪氣。遇春還北岸。斷浮橋。焚渡船。欲卽營其地。扼賊咽喉。高杞等不可。時那彥成已至衛輝。聞滑賊盛。請俟調山西。甘肅。吉林。索倫兵五千而後進。詔切責之。亦馳至軍。時楊遇春以固原兵擊賊。連斬獲二十七。日官兵會攻道口。遇春自衝其前。所嚮賊望見。髯將軍輒披靡。大破之。又敗滑城來援賊二千。遂奪道口。燒賊萬計。復擊走桃源賊三千于城。

東進圍滑方是時

上命尙書托津統吉林索倫兵

以辦直隸開州之賊又

命副都統蘇爾慎往山東

助剿曹州時金鄉以知縣吳階守禦得不破而山東鹽運使劉清故在四川將鄉兵剿賊有名至是以文吏將官兵大破曹州賊于定陶之髣山復定陶十月劉清復破賊韓家廟再破賊扈家集皆劉清身先士卒而總兵陳某反隨後策應云于是山東賊略盡

命蘇爾慎

回開州助托津會剿十一月破賊數千于湯二莊署直隸總督章煦復奏禽滑縣賊首馮克善于獻縣直隸之賊亦定乃

詔索倫兵悉赴河南滑縣爲古滑州舊

治城堅厚外磚內土中沙大礮攻之遇沙而止賊運道
口糧峙其中足支一載嚴脅居民無敢內應官軍圍滑
三面惟北門隔葦塘未合圍于是桃源賊首劉國明潛
入滑護李文成出收外黨西入太行為流寇計文成脛
創不能騎乃輕車出北門招賊四千入輝縣山據司寨
那彥成遣總兵楊芳追之十九日伏騎白土岡誘賊出
司寨佯走伏起敗之又追擊于南首山殺賊二千餘進
奪司寨李文成縱火自焚死獲其屍官兵齊集滑晝夜
環攻而陝西三才峽賊又起于是上督諸將刻期
破賊先是城外連掘地隧十餘皆爲賊覺或水灌之或

濠截之。至是楊芳佯築他柵進攻而潛掘舊隧滿實火藥。至期官軍皆三里外甲騎以待。十二月十日平明城西南角雷轟地震崩裂二十餘丈。塼石滿空賊燒震死千百。官軍奮前奪城及晡諸將各蟻附而入巷戰至夜又殲其昏黑突圍之賊三千餘。先後共殲賊二萬免老幼男婦二萬有餘。俘賊首牛亮臣徐安國等檻獻京師。滑縣平。加那彥成太子太保。封三等子。楊遇春三等男。諸將士楊芳劉清等以下賞賚有差。惟溫承惠以賊起。畿甸不覺察。又將兵逗留降黜而豫親王以先期聞賊黨祝顯逆謀不舉發削封爵以強。

克捷首發賊功

賜諡忠烈世襲輕車都尉韓城滑

縣各建專祠復

命那彥成等會剿陝西三才峽箱

賊箱賊者南山木商夫役歲饑停工掠食吏捕之有萬
二者煽衆入山巡撫朱勲遣吏講解賊益恣衆至數千
燒木箱朱勲遂以教匪聞總兵祝廷彪吳廷剛等屢破
斬之餘賊悉降時十九年正月也自賊起事首尾五閱
月騷動四省而是秋黃河又決儀封軍饟宣防交急司
農竭蹶于是吏部侍郎吳璥復請開捐例議者以賊起
多由吏饗民困今復開捐輸是吏治重弊也久不決
上乃下詔曰開捐助帑原非得已之政使籌畫有方

朕亦何樂是舉。邇因軍餉河工經費浩大。命諸臣籌裕餉之策。類皆空言無事實。最後英和一疏。極陳開捐之弊。而請復名糧開礦。厥事亦難行。中外大臣食君之祿。皆當忠君之事。果有生財裕餉之方。但封章朝聞。則捐例夕罷。若徒爲書生陳言。朕久已熟聞。無庸贅瀆也。于是大學士董誥請京兌秤贏二兩。兩江總督百齡請增典商息三分。上皆以非政體留中。而捐例遂復。開一如乾隆川運嘉慶川楚土方衡工工賑之例。自十九年四月至明年五月乃止。謂之豫東例。